

**ՊԱՇՏՈՆԱԿԱՆ ԸՆԴԴԻՄԱԽՈՍ ՔԱՆԱՍԻՐԱԿԱՆ ԳԻՏՈՒԹՅՈՒՆՆԵՐԻ
ԹԵԿՆԱԾՈՒ, ԴՈՑԵՆՏ ՌՈՒԶԱՆ ՂԱԶԱՐՅԱՆԻ ԿԱՐԾԻՔԸ
ՀԱՍՄԻԿ ՋԻՎԱՆԻ ՀԱԿՈՐՅԱՆԻ «ՄԻՋՏԵՔՍԱՅՆՈՒԹՅՈՒՆԸ ԱՐԴԻ ՀԱՅ
ԱՐՁԱԿՈՒՄ» (2000-ԱԿԱՆ ԹԹ.) ԹԵԿՆԱԾՈՒԱԿԱՆ
ԱՏԵՆԱԽՈՍՈՒԹՅԱՆ ՄԱՍԻՆ**

Հրապարակային պաշտպանության ներկայացված թեկնածուական այս ատենախոսությունը նվիրված է գրականության տեսության կարևորագույն և արդիական հիմնախնդիրներից մեկին՝ միջտեքստայնության դրսևորումների, գործառույթների և գեղագիտական առանձնահատկությունների ըննությանը ժամանակակից՝ 2000-ական թվականների հայ արձակում: Միջտեքստայնության ըննաբանությունը, հարկավ, նորություն չէ գրականագիտության մեջ, մեր իրականության մեջ խնդրի վերհանման և լրջմիտ հետազոտության առաջամարտիկը պրոֆ. Ժենյա Քալանթարյանն է, որը տեսական այդ խնդրին նվիրված իր հոդվածներով շրջանառության մեջ դրեց այդ եզրույթը և մեզանում ծնավորեց դրա ընկալման տեսական հիմքերը:

Թեմայի ընտրությունը պատահական չէ. այն, անուշտ, պայմանավորված է արդի գրական գործընթացներում միջտեքստայնության բացառիկ ակտիվացմամբ: Ժամանակակից գեղարվեստական տեքստն առավելապես կառուցվում է բազմաշերտ հղումների, մշակութային հիշողության, պատմական ու գաղափարական կոդերի համադրության միջոցով՝ ընթերցողից ակնկալելով որոշակի նախագիտելիք և մշակութաբանական պաշար լիարժեք և համակողմանի ընթերցանության համար: Եվ ատենախոսության հեղինակը միանգամայն իրավացիորեն շեշտում է, որ միջտեքստային իրողությունների ըննությունը պարզապես անհրաժեշտ է, որպեսզի հասկանալի դառնան պատմական հիշողության, ինքնության և գեղարվեստական մտածողության վերակառուցման գործընթացները: Այս առումով հետազոտությունը ոչ միայն համապատասխանում է ժամանակակից հայ գրականագիտության շահեկան որոնումներին, այլև կարևոր ներդրում է ընդհանրապես գրականության տեսության ասպարեզում:

Ատենախոսության ներածության մեջ հստակ ներկայացված են թեմայի արդիականությունը, հարցի պատմությունը, հետազոտության նպատակներն ու խնդիրները, գի-

տական նորույթը, մեթոդաբանական հիմքերը և կիրառական նշանակությունը: Հեղինակը հիմնավորված ցույց է տալիս միջտեքստայնության բազմավեկտոր շառավիղները, որոնք մի կողմից հանդես են գալիս որպես գեղարվեստական հնարք, մյուս կողմից՝ իբրև պատմական հիշողության, ազգային ինքնության և մշակութային փորձառության վերակառուցման մեխանիզմ: Եվ գնահատելի է, որ այս դրույթը հետազոտության ամբողջ ընթացքում հետևողականորեն ապացուցվում է բնագրային բազմակողմանի վերլուծություններով:

Ակնառու է, որ հետազոտությունը հենվում է նպատակասլաց մեթոդաբանական հենքի վրա՝ պոետիկա, հերմենևտիկա (Պոլ Ռիկյոր), ֆենոմենոլոգիա և սոցիոլոգիա: Արդյունավետորեն կիրառված են նաև Մ. Հիրշի հետհիշողության (postmemory) տեսությունը և նարատիվ վերլուծության մեթոդները:

Ամենագնահատելին թերևս ատենախոսության գիտական նորույթի բազմաշերտությունն է: Նախ՝ առաջին անգամ արդի հայ արձակում միջտեքստայնությունը դիտարկվում է որպես պատմական հիշողության և ինքնության կառուցման համակարգային քննաբանություն: Կիրառվել է նաև Լինդա Հաթչոնի պատմագրական մետագեղարվեստականության տեսությունը՝ բացահայտելով հայ և համաշխարհային հետմոդերնիստական գրականության փոխկապակցվածությունը: Բացի այդ՝ առանձնացվել են միջտեքստայնության նոր շերտեր՝ պատմագրական, ինքնակենսագրական, բանահյուսական ու մետալեզվական, և միջտեքստայնությունը քննվել է որպես պատմության վերափմաստավորման և ցավալի անցյալի (ցեղասպանություն, պատերազմ) փոխանցման մեխանիզմ:

Ատենախոսության առաջին գլուխը՝ «Միջտեքստայնության պատմական և տեսական հիմքերը, հետմոդերնիստական առանձնահատկությունները», ունի տեսական կարևոր նշանակություն: Ատենախոսը հանգամանորեն ներկայացնում է միջտեքստայնության տեսության ձևավորման պատմությունը՝ անդրադառնալով Յուլյա Կրիստևայի, Միխայիլ Բախտինի, Ռոլան Բարտի, Ժերար Ժենետի, Յուրի Լոտմանի և այլ հեղինակավոր տեսաբանների հայեցակարգերին: Առանձնակի ուշադրության է արժանի այն հանգամանքը, որ տեսական նյութը ներկայացվում է քննադատական համադրությունների միջոցով: Հետազոտողը կարողացել է տեսական տարբեր մոտեցումները ներգրավել

արդի հայ արձակի քննության համատեքստում՝ ցույց տալով դրանց կիրառական արդյունավետությունը:

Գնահատելի է նաև այն, որ ատենախոսության մեջ միջտեքստայնությունը դիտարկվում է ոչ միայն գրականագիտական, այլև փիլիսոփայական, սոցիոլոգիական և մշակութաբանական համատեքստերում: Ֆերդինանդ դը Սոայուրի նշանագիտության, Բախտինի երկխոսության տեսության, Լինդա Հաթչոնի պատմագրական մետագեղարվեստականության հայեցակարգի և հետմոդեռնիզմի այլ տեսական մոտեցումների համադրումը հնարավորություն է ընձեռել ձևավորելու հետազոտության մեթոդաբանական մի ամբողջական համակարգ:

Աշխատանքի երկրորդ գլուխը՝ «Միջտեքստայնությունը՝ որպես պատմագրական մետագեղարվեստականության մեխանիզմ», առանձնանում է հատկապես իր գիտական նորույթով: Ատենախոսը փաստարկում է, որ ժամանակակից հայ արձակում պատմությունը ներկայացվում է ոչ թե որպես անփոփոխ փաստերի ամբողջություն, այլ որպես լեզվական ու գաղափարական կառուցում: Այս տեսանկյունից արժեքավոր են Վահագն Գրիգորյանի, Նորայր Սարգսյանի և այլ հեղինակների ստեղծագործությունների վերլուծությունները, որոնց միջոցով բացահայտվում են պատմության վերաշարադրման, հիշողության պահպանման և քաղաքական դիսկուրսների քննադատության մեխանիզմները:

Կարծում եմ, որ ատենախոսության այս հատվածում հատկապես հաջողված է Նորայր Սարգսյանի «Հանրապետություններից երրորդը» վեպի քննությունը, ատենախոսը համոզիչ կերպով բացահայտում է սիմուլյակրի, պարոդիայի և պատմական հեգնանքի կիրառությունները խնդրո առարկա երկում: Նա կարողանում է հիմնավորել, որ միջտեքստայնությունն այստեղ վերածվում է պատմական գիտակցության քննադատության միջոցի:

Ատենախոսության երրորդ գլուխը՝ «Աստվածաշնչյան, մշակութային և այլ հղումների հետմոդեռնիստական ընթերցումներ», աչքի է ընկնում լայն նյութի ընդգրկմամբ և հետաքրքիր մեկնաբանություններով: Արփի Ոսկանյանի, Գուրգեն Խանջյանի, Արարատ Գյուլբանգյանի ստեղծագործությունների քննությունը ցույց է տալիս, թե ինչպես են աստվածաշնչյան, մշակութային, գիտական և գանգվածային մշակույթի հղումները վերաիմաստավորվում հետմոդեռնիստական աշխարհընկալման շրջանակներում: Ատենախո-

սը կարողացել է բացահայտել ժամանակակից մարդու հոգևոր ճգնաժամը, արժեքային համակարգերի փլուզումը և իրականության ֆրագմենտացված ընկալումը՝ միջտեքստային բազմաշերտ կապերի միջոցով:

Ատենախոսության կարևոր արժանիքներից է նաև լայն և բազմաբնույթ աղբյուրագիտական հենքը: Հեղինակը ներգրավել է թե՛ արևմտյան, թե՛ ռուսական և թե՛ հայ գրականագիտական աշխատություններ, կարողացել է դրանք ստեղծագործաբար կիրառել հայ գրական նյութի վերլուծության ընթացքում: Ակնհայտ է նաև հեղինակի մասնագիտական բարձր պատրաստվածությունը, տեսական գրականության քաջիմացությունն ու գիտական լեզվի տիրապետումը:

Աշխատանքն ունի նաև գործնական նշանակություն: Այն կարող է օգտակար լինել ժամանակակից հայ գրականության, գրականության տեսության, հետմոդեռնիզմի և միջտեքստայնության դասընթացների համար, ինչպես նաև ծառայել հետագա գիտական ուսումնասիրությունների հիմք:

Բայց և այնպես՝ չնայած աշխատանքի գիտական պատշաճ մակարդակին՝ նկատելի են որոշ թերացումներ, որոնք, սակայն, չեն նվազեցնում աշխատանքի ընդհանուր գիտական արժեքը:

1. Որոշ հատվածներում տեսական անդրադարձերը չափազանց ծավալուն են ու երբեմն գերակշռում են բնագրային վերլուծությանը: Հատկապես առաջին գլխում կարելի էր տեսական հատվածների մի մասն ավելի խտացնել:
2. Ատենախոսության մեջ երբեմն միջտեքստայնության տարբեր ենթատեսակների սահմանները լիովին հստակ չեն տարբերակվում, մասնավորապես՝ հիպերտեքստայնության, մետատեքստայնության և պարողիկ վերաշարադրումների սահմանները:
3. Երրորդ գլխում քննվող «կյանքի տարբեր ոլորտների հղումները» (ֆիզիկա, շախմատ) չափազանց հետաքրքիր են, սակայն երբեմն տեսական ընդհանրացումները զիջում են բնագրային նկարագրությանը:
4. Ցանկալի կլիներ ավելի լայնորեն անդրադառնալ նաև թվային մշակույթի և սոցիալական մեդիայի ազդեցությանը արդի հայ արձակի միջտեքստային կառուցվածքների ձևավորման վրա, քանի որ այդ երևույթը 2000-ականների գրական գործընթացի կարևոր բաղադրիչներից է:

Այդուհանդերձ, նշված դիտարկումները հիմնականում ունեն մասնավոր բնույթ և չեն ազդում աշխատանքի ընդհանուր քարծր գնահատականի վրա: Եվ իմ եզրակացությունը հետևյալն է՝

Հասմիկ Հակոբյանի ատենախոսությունը հասուն, ինքնուրույն և համակողմանի հետազոտություն է, որն ունի թե՛ տեսական, թե՛ կիրառական մեծ նշանակություն: Այն լրացնում է հայ գրականագիտության մեջ առկա բացը և նոր լույս սփռում արդի հայ արձակի զարգացման միտումների վրա:

Հեղինակի կողմից հրատարակված գիտական 6 հոդվածները, մենագրությունը և ատենախոսության սեղմագիրը լիովին արտացոլում են ատենախոսության հիմնադրույթները:

Այսպիսով՝ Հասմիկ Զիվանի Հակոբյանի «Միջտեքստայնությունը արդի հայ արձակում (2000-ական թթ.)» ատենախոսությունը համապատասխանում է ՀՀ ԲԿԳԿ-ի կողմից թեկնածուական ատենախոսություններին ներկայացվող պահանջներին, իսկ հեղինակը լիովին արժանի է իր հայցած՝ բանասիրական գիտությունների թեկնածուի գիտական աստիճանի շնորհմանը՝ Ժ. 01. 04 – «Գրականության տեսություն» մասնագիտությամբ:

18. 06. 2026 թ.

Պաշտոնական ընդդիմախոս՝
Ռուզան Ռաֆայելի Ղազարյան
բանաս. գիտ. թեկնածու, դոցենտ

Բանաս. գիտ. թեկնածու, դոցենտ Ռուզան Ռաֆայելի Ղազարյանի ստորագրությունը հաստատում եմ՝

ԵՊՀ գիտքարտուղար՝ Բ. Գ. Թ., դոցենտ

Մ. Վ. Հովհաննիսյան

